

1 PETRO

Merepanika Petro

Iokanatsopatakiti

¹ Petro nitxaua nota. Xesosi Kristo iokanatakiti nitxaua. Niokanatsopata h̄ite Xesosi s̄akire auiākanimoni. H̄ite iarikape P̄oto tixiniā, Karásia tixiniā, Kapatósia tixiniā, Ásia tixiniā, Pitxínia tixiniā pakini. H̄itakanapari h̄iteka tixine Xesosi s̄akire h̄auikini xika. Āti uākakata h̄uanāta.

² Āiri Teoso mereēi h̄ite iua nakitiakori hininiua ĩkapani. Itixi kamiko apisa, iua imarotapekari h̄ite iua anaakori hininiua. Erekaru Matamatakoti parĩkauata h̄akixinireē Teoso nireēkitinoka h̄ikamini ĩkapani. Ininiā uatxa h̄iposotiire aua Xesosi Kristo paniātakiti h̄ikamini ĩkapani, kotxi Xesosi Kristo arēka xikepoata h̄ite ĩkapani. Teoso sikari ikinipoko erekaru h̄itemoni. Itori isikai. Iteene ikamaerekaxiniretai.

Kākiti Maerekani Makatxakiko

³ Mamis̄akiretari Teoso: “Peerekai pite. Āūite Xesosi Kristo Teosone pitxaua. Iua iri pitxaua,” matxari. Maerekati kamakaniua, iuaritika iteene iamonīkaua. Itx̄ikitakari axinire iuaĩkana iponaniini, kotxi Xesosi Kristo ipina, iuaritika iuaĩkana ōkitikaua. Ininiā ikiniōtika aimarotari Teoso kaminiri ikinipoko ikamaenetakiti.

⁴ Iuaĩkana axinire iponaniā, ininiā iua anaakori atxaua. Ininiā āiri potetakiti erekaru aua itixineē āapakapini ĩkapani. Ikara ipotetakiti ! ixipoka.

! Oerēkata. Auapika. Teoso nīkatari ikara hīte īkapani.

⁵ Hīte auikari Teoso sākire, ininiā iposotiire tokapakeētai hīte. Hīte itokapakeētiniritika Xesosi kanapiriāko xipokatxi ōtisaaki. ⁶ Ikara himarota, ininiā iteene hīpoxokoniūata. Uatxa atxiīti !erekaxinirei hīte, kotxi ikini sereti maerekati apoka hītemoni. ⁷ Ikini sereti himaxikiko apoka hītemoni, kotxi iusaaki Teoso imarotari atāo hāuikiniri iua sākire, himīteenekiniāri himaxikiko. Iusaaki Teoso ataerekatai hīte, oro ataerekatiko atokokana. Kākiti axitaro oro otxiko makatxakiko īkapani, oronoka kaikotini īkapani. Iusaaki peerekaro. Pakaronero. Iuaritika āti ōti oxipokaākako. Erekaroro, iuaritika apiaerekata hāuikiniri Teoso sākire, kotxi isākire hāuikini !ixipoka. Xesosi Kristo kanapiriākasaaki īkorapokoriti, Teoso sāpiretaiko hīte: “Erekari hāuikiniri nisākire, kotxi himīteenekari ikinipoko. Peerekai hīte,” itxai hīte. Iusaaki hīto iotximere auape Xesosi iotximere atokokana.

⁸ Hīte kona aōkitapanikari Teoso, iuaritika hītiretari iua. Kona hātamatapanikari, iuaritika hāuikari iua sākire. Ininiā hīte iteene poxokoniūata. Kākiti sākireē !apakata hīsāpiretiniri hīpoxokoni. ⁹ Hīpoxokoniūata, kotxi himaerekani makatxakaākapeka. Ininiā hīxinire !ipinaika, kotxi hāuikari Xesosi sākire.

¹⁰ Kitxakapirīka Teoso sākire sāpiretakani nirekamari imarotininirina kākiti maerekani makatxakiko. Initarina ikara imarotininina Teoso sākire iōkatsopatakoriā. Iteene apaiaōkarauatana ikara imarotininina īkapani. Ninoa sāpiretari ikara erekari, Teoso āti ōti sikiniri kākiti. ¹¹ Inirekarina

imarotnirina ikara erekari apokini õti. “Kisaakipa apoka atxiĩti? Natokopa itxa apokini?” itxanãtana. Iuasaaki Erekari Matamatakoti oerekana ninoa ãkixinireẽna Kristo atatsiirauatini tĩkane. Oerekana ninoa Kristo atatsiirauatini xipoka atoko, ikinimane auĩte itxauako. Peerekari iuasaaki. ¹² Kitxakapirĩka Teoso sãpiretari ikamakiti tĩkane isãkire sãpiretakanimoni, kona ninoanoka imarotini ĩkapanini. Ninoa sãpiretari Teoso kamakiti tĩkane hĩte ĩkapani, kotxi uatxa apokapeka ninoa sãkire iaõka. Kitxakapirĩka Teoso sãpiretari ikamakiti tĩkane ninoamoni, ate uatxa imarotini ĩkapani. Teoso iokanapirena erekari sãpiretakani sãpiretapekai uatxa ikara Teoso sãpiretakiti kitxakapirĩka. Teoso paniãtari Erekari Matamatakoti potarikini itixine uai apokini ĩkapani. Erekari Matamatakoti posotiireẽ ninoa sãpiretari Teoso iokanapirena erekari. Teoso nitiriakori iaxitikini iteene nirekamari imarotnirina hĩte imarotakiti.

Ereka Hĩtxako

¹³ Ininiã iposope hĩtxako hĩxinikiniri atão inakari hĩkamini. !Hĩkamapiri maerekati hiĩto nireẽkiti. Itene hãuikariko hãpakapiniri ikinipoko erekari Teoso sikakiti Xesosi Kristo kanapiriãkasaaki. ¹⁴ Amarini kaminiri iri paniãtakiti atokotxikana, hĩkamariko Teoso paniãtakiti. Xesosi sãkire himimarotakanisaaki, hĩkamari maerekati hinireẽkiti. Uatxa ! hĩkamapinikariko. ¹⁵ Hĩte akiritakari kamari erekarinoka, ininiã iua atokokana erekarinoka hĩkama ikiniõtika. ¹⁶ Teoso sãkire iõkatsopatakori txari:
Erekarinoka hĩkamako, kotxi nota kamari erekarinoka,

itxa Teoso kitxakapirīka.

¹⁷ Himisākiretari hīri iaxiti auakari. Atāonoka ikaminana ikinimane kākiti iparīkana atamatakasaaki. Ininiā kākiti kamakasaakiri maerekati, aīri misiritiniri āti atokotxikana, imisiritari āti. Himitekini !auari. Hīxinikariko, haāpoko atāo inakari īkorapokoriti ! auari. Teoso tixineē aua haāpoko. Ininiā īkorapokoriti hāuakasaaki, iteene hīpaxitariko Teoso. Hīpīkariko iua manirekakiniti hīkamini. ¹⁸ Mitxi !apakata hāuini, kotxi iuasaaki hīkamari hātokiriakorini sākire iaōka. Uatxa Xesosi oerekai ātiāo hāuini, kotxi iamotai hīte, iua nakitiakori hininiua īkapani. Himarotari iamotini. !Iamotai pirataā. !Iamotai oroā. !Iamotai txineiroā, kotxi pirata, oro, txineiro pakini xipokako. ¹⁹ Kristo arēkaā iamotai hīte, kotxi ipīkasaaki iamotai hīte. Peerekari iua arēka, kotxi iua arēka makatxakari amaerekani. Soti auīte erekari atoko itxa Kristo. Kona maerekati aua iuamoni. ²⁰ Itixi kamiko apisa, Teoso mereēri iua. Iua apoka uai himaerekani imakatzakini īkapani. ²¹ Xesosi txīkitakai hīte auikiniri Teoso auini, kotxi Teoso iuaīkana ōkitikari Xesosi ipīkani sauaki. Iuasaaki isāpiretari Xesosi ikinika ikamakiti ereka inini. Ikara atoko ininiā, hāuikari Teoso sākire. Himarotari isākire iaōka ikamini. ²² Erekari Matamatakoti oerekapekai atāo inakari, ininiā uatxa hīkamari atāo inakari. Ikara atoko ininiā, hākixinire erekari. Ininiākara atāo hītiretari hītariakori. Ininiā iteene hītiretakauako hākixinireē.

²³ Hīte xinire iuaīkana iponaniāpeka. Teoso sākireē hīxinire iponaniā iuaīkana. Teoso sākire auapika. !Ixipoka. Ininiā iua anaakori hītxaua. Hīri īkorapokoriti auakani xipoka. Hīri iaxiti

auakari !ixipoka, ininiã h̄te iua anaakori !ixipoka apaka. ²⁴ Teoso s̄akire iōkatsopatakori txari:

Kākiti katsotati atoko itxa. Katsotati paītiki ipinini.

Iua atokokana patimari kākiti ipina. Ikinika erekari ikamakiti, aãui atoko itxa. Aãui patimari ipinini. Iua atokokana patimari kākiti kamakiti xipokini.

²⁵ Iuaritika Teoso s̄akire auapika. !Kaxiporeri, itxa Teoso s̄akire iōkatsopatakori. Teoso s̄akirepitikara s̄āpiretaākapeka h̄temoni, h̄ikenakotakasaakiri Teoso iokanapirena erekari.

2

¹ Ininiãkara h̄takanapariko ikinipoko maerekati h̄kamakiti. !Himisirienetapiri ãti. H̄ikamariko h̄s̄akire iaōka. !H̄ixikotapiri ãti. !Himis̄akirepiretapiri ãti. Ikini sereti maerekati kākiti kamakiti h̄takanapako.

² Hinirekariko Teoso s̄akire makoketakoti. Tinitxiã imi axapitiri nirekini atokokana, hinirekariko Teoso s̄akire. Teoso s̄akire h̄āpakapakasaaki, himaroãpotari iua, ininiã apiaãpota h̄āuikiniri iua s̄akire. ³ Kotxi uatxa himarotapekari Apiananiri ereka inini.

Kai Atoko Itxa Xesosi

⁴ Ininiã h̄sako Xesosimoni, kotxi auapika inakari itxaua. Kai aapokotxi kamakari manirekakiniti atoko itxa Xesosi. Kākiti !inirekari iua. Iuaritika Teoso mereēri iua. Teoso tirketakiti itxaua Xesosi. ⁵ H̄te apaka kai atoko h̄txaua Teoso aapoko ĩkapani. Itx̄ikitakari h̄xinire auãki inini, kotxi iua nakitiakori h̄txaua. Ininiã, Teoso aapoko atoko h̄txaua. Ininiã iua aapoko ãki sasetotxi h̄txaua, iua ĩkapani h̄parĩkauatini. Ininiã h̄s̄ikariko

iua amanaãkiti, iua nireëkiti. Iua apakapariko h̄sikakiti, kotxi Xesosi Kristo makatxakapekari himaerekani. ⁶ Teoso sãkire iõkatsopatakori txari:

Hãtamata. Nitakari kai Sião sitatxitiã. Iua kai apiari, Teoso mereëkiti. Apiaerekata iua. Iua kai atoko inakari sãkire auiãkani !ipëtauata, itxa Teoso sãkire.

⁷ Iua kai atoko inakari itxaua Xesosi. Peerekari Xesosi h̄temoni, kotxi h̄te auikari iua sãkire. ãti iua atoko inakari ! auari. Txamari isãkire mak̄ipitakani ! inirekari iua. Teoso sãkire iõkatsopatakori txari:

Aiko kamakani txari: “! Apakata ia kai. ! Anirekari.” Iuaritika iua kai apiari. Itakaãka aiko kamikosaaki, apanakini kai soro maĩkakarini ininiua ãkapani.

⁸ Iuaãkana Teoso sãkire iõkatsopatakori txari:

Iua kai xika kãkiti mãkitita. Iua kai xika kãkiti irika, itxa Teoso sãkire. Imãkititana, kotxi ! auikarina Teoso sãkire. Teoso txĩkitakana ninoa irikini, kotxi ! auikarina iua sãkire.

⁹ H̄tepekana, Teoso mereëkini h̄txaua. Sasetotxi h̄txaua. H̄iparĩkauata Apiananiri ãkapani. H̄te makatxakaãka maerekani sauaki erekarinoka h̄kamini ãkapani. Teoso nakitiakori h̄txaua. Imereëi h̄te iua ereka inini kãkiti h̄orekini ãkapani, kotxi ipiã h̄auakasaaki, iuara akiritai h̄te ipiã h̄takanapini ãkapani. Itakai ikamaraã atão inakari himarotini ãkapani. Peerekari iua kamara. ¹⁰ Mitxi Teoso nakitiakori ! h̄txaua. Uatxa Teoso nakitiakori h̄txapekaua. Mitxi Teoso ! amonĩkapanikai. Uatxa Teoso amonĩkapekai.

Teoso Nitiriakori Iamotakoni Pirena

11 Nitiretakini, uai itixi hãuakasaaki, ãti tixinikini atoko hĩtxa. Atão hãapoko Teoso tixine aua. Īkorasaaki hĩsaãpota hãapokomoni. Ininiã ikini nixinireritika nõtãkikai hĩte himakamakaniri maerekati hĩto nireẽkiti. Hĩto nireẽkiti hĩxinire mokaiakari atoko itxa. Hĩto !inirekari hĩxinire nireẽkiti. ¹² Teoso sãkire mauĩãkani sauaki hãuakasaaki, ikiniõtika erekarinoka hĩkamako. Atxiĩti ninoa maxikatiĩka apoĩtai maerekati hĩkamini, iuaritika iusaaki ninoa imarotari erekarinoka hĩkamini. Ininiã Teoso ketotini õti manapi iua oerekariko atão inakari ninoamoni. Ininiã iusaaki ixinikarinako erekari hĩkamakiti. Ininiã itxarinako Teoso: “Peerekai pite,” itxana.

Hĩkamariko Hĩauĩte Paniãtakiti

¹³ Hĩkamariko kãkiti auĩtetakini paniãtakiti, kotxi Apiananiri nirekari ikara atoko hĩkamini. Ikinimane hĩauĩteakori paniãtakiti hĩkamako. Hĩauĩte apiari paniãtakiti hĩkamako. ¹⁴ Hĩauĩte poiãori paniãtakiti apaka hĩkamako, kotxi hĩauĩte apiari paniãtana hĩauĩte poiãorini maerekati kamakani imisiritinina ĩkapani. Ipaniãtana ninoa isãpiretinina erekari kamakani: “Erekapitikari hĩkamakiti.” ¹⁵ Teoso nirekari hĩkaminiri erekari, ininiã iusaaki miĩkiteni ! iposotari imisãkirepiretinii hĩte. ! Kasãkirena iusaaki, kotxi apanakini imarotari erekarinoka hĩkamini. ¹⁶ Hĩposotari ikinipoko hinireẽkiti hĩkamini, kotxi Teoso sikakai hĩte. Iuaritika kona hinirekapiri maerekati hĩkamini. Teoso nitiriakori hĩtxaua, ininiã iua paniãtakitinoka hĩkamako. ¹⁷ Hĩpaxitariko ikinimane. Hĩtiretanako ikinimane aĩtariakori Teoso sãkire auĩãkani. Hĩpĩkariko Teoso. Hĩpaxitariko hĩauĩte apiari.

Hĭkamariko Hĭpatrāote Paniātakiti

18 Nitiritxiakori, hĭkamariko hĭpatrāote paniātakiti. Hĭpaxitariko iua. Atxiĭti iua tiretai. Atxiĭti imisiritai. Iuaritika hĭpaxitariko iua. 19 Erekapitikari himĭteenekiniri kākiti misiritinii maxikatiĭka. Himĭteenekiniāri, Teoso nireēkiti hĭkamini ĭkapani, erekapitikari. 20 Erekarĭ hĭpatrāote misiritinii hĭte, maerekati hĭkamakasaaki. Iuasaaki himĭteenekiniri himisiritiko kona txĭkitakari Teoso apokaerekatinii. Erekarĭ hĭkamakasaaki, himĭteenekiniāri himisiritiko, iuasaaki Teosomoni erekapitikai.

Kristo Misiritiko

21 Teoso akiritai hĭte inakitiakori hininiua ĭkapani, himisiritiko himĭteenekini ĭkapani. Kristo misiritaāka hĭte ĭkapani, ininiā iua nirekarĭ amĭteenekiniri amisiritiko iua misiritiko imĭteenekini atokokana.

22 Maerekati !ikama. !Imisirienetari āti.

23 Ninoa misākirepiretakasaakiri iua, ! apakapaenetana. Imisiritakasaakirina iua, ! itxitana. !Isāpiretana imisiritinina imaerekanina xika. Iua auĭkari iri nĭkatiniri iua, kotxi atāonoka kamakari itxaua Teoso. Atāo imarotari kākiti kamakiti. 24 Aamina ĭpiriāmitakari nopini Xesosi ĭto misiritaāka ate maerekani xika. Ipina ate ĭkapani, apikomoni maerekati akamini amanirekakani ĭkapani. Inirekarĭ anireēkiti maerekati ipĭkari atoko inini. Itxĭkitakari axinire auāki inini atāo inakarĭnoka akamini ĭkapani. Xesosi karo txĭkitakaua erekape anini. 25 Xesosi himarotini apisapanika, soti auĭte pĭpinanakakani atoko hĭtxa. Uatxa hĭkanapiriāpeka hĭpitikirimoni. Hĭxinire nĭkatarimoni hĭpokapeka uatxa.

3

Taniritxi, Tanorotxi Pakini Ōtākikiko Pirena

¹ Nitiritxi kaminiri ipatrāote paniātakiti atokokana, hīte tanorotxi hīkamariko hītaniri nireēkiti. Atxiīti hītaniri ! auikari Teoso sākire, ininiā erekarinoka hīkamako. Atamatakasaakirina erekari hīkamakiti, ninoa auikari Teoso sākire. Hīkamakiti erekari txīkitakana auikininirina Teoso sākire. Hīsākirenoka ! itxīkitakana auikininirina. ² Maerekati himakamakanisaaki ikiniōtika, Teoso iteene hīpaxitiniā ikiniōtika, iusaaki ninoa auikari Teoso sākire atāo inini.

³ Apanakini sito xinikapikari oiāko oōeretini, oro oītoā otakini, omāka ereri oieretakini, oīto ere inini ikapaninani oxinika. Sito erero ! oxinikari ikaranani. ⁴ Sito erero oākixinire ereri apaka. Hākixinire ereri inakasaaki, ikara ereri ! ixipokapani. Hākixinire ereri inakasaaki, !hītxitapiri hītaniri. Hīkamari iua nireēkiti. Teosomoni apiarekata hākixinire ereri inini.

⁵ Kitxakapirīka sitoākini ererini, Teoso sākire auiākani, ikara atoko inakani. Ninoa ākixinire erekari, kotxi ikīpitarina itanirina sākire. ⁶ Sara inakoro kamari Apraāo sākire iaōka. Oa kamari Apraāo paniātakiti, kotxi oamoni oa auīte itxaua Apraāo. Sara anaakoro atoko hītxaua atāonoka hīkaminiā, himapīkarauatakaniā.

⁷ Hīte taniritxi, iua atokokana hīxinikariko erekari hīkaminana hītanoro. Hīpaxitaroko hītanoro, kotxi !katapararo. Oa apaka hītekata apakapariko Teoso sikakiti erekari. Iua txīkitakai hāuapininiika hinini iuakata. Hītiretaroko hītanoro, ininiā Teoso kenakotariko himisākiretiniri iua.

Himisiritiko Pirena

8 Ia nisäkire mapotökire nisäpiretai. Hixinikakiti ätika xinikakiti atoko hïtxako. Hiamonïkakauako. Hïtïretariko äti, hïtari hïtïretini atokotxikana. Hïkamariko erekari ätimoni. ! Hïuikapeua. 9 Äti kaminiäri maerekati hïtemoni, ! hïkamapiri maerekati iuamoni. Äti misäkirepiretakasaakii, kona hïte misäkirepiretapiri iua. Äti kaminiäri maerekati hïtemoni, iusaaki hamanaäri Teoso sikiniri erekari iuamoni, kotxi Teoso paniätai ikara atoko inakari hïkamini, erekari Teoso sikakiti hïte apaka apakapini ïkapani. 10 Teoso säkire iökatsopatakori txari:

Pinirekiniäri pauini ereka inini, pinirekiniäri ikiniötika pipoxokoniuatini, ! pauiritapiri pisäkire maerekati inini. ! Pimisïrienetapiri äti.

11 Pinirekiniäri pauini ereka inini, pitakanapariko maerekati pikamini. Erekarinoka pikamako. Pitakanapariko pineenamauatini. Pinirekariko käkiti auini ereka inini.

12 Apiananiri nïkatari käkiti atäo inakari kamakani. Teoso imisäkiretakasaakina, Teoso kenakotapitikari isäkirena. Txamari Apiananiri misiritari maerekati kamakani, itxa Teoso säkire kitxakapirïka.

13 Erekari hïkamakasaaki, käkiti ! inirekari imisiritinii. 14 Atäo inakari hïkamakasaaki, käkiti misiritiniäi, häpakapariko erekari Teoso sikakiti. Ininiä ! hïpïkapena ninoa. Maerekaxiniretinoka ! hïtxape. 15 Häkixinireë hïtxako: “Teosonoka niauïte. Apiananiri itxaua. Iua nireëkitinoka nikamako.” Ikara atoko hïtxako. Häpaiaökariko Teoso säkire, isäkire iteene himarotini ïkapani.

Ininiã kãkiti pimainiã: “Kinirepa hãuikari Teoso sãkire?” Iuasaaki himarotari hãpakapapiretiniri iua. Hãpakapapiretakasaakiri iua, ! hĩtxitapiri. Hĩpaxitariko iua iuasaaki. ¹⁶ Hĩsãkirauatakasaaki, ! hĩsãpiretapiri hãkixinire manirekakiniti. Hinirekariko erekari hãkixinire nireẽkiti hĩkamini. Apanakini misãkirepiretai. Ninoa atamatakasaakiri erekari hĩkamakiti Kristo paniãtakiti, ipẽtatari imisãkirepiretinii. ¹⁷ Teoso nirekiniãri hãtatsiirauatini erekari hĩkamini xika, ininiã erekari, kotxi iuasaaki hĩkamari erekari. Txamari hãtatsiirauatiniã himaerekani hĩkamini xika, !erekari, kotxi iuasaaki hĩkamari maerekati.

¹⁸ Xesosi Kristo ipina kãkiti maerekani imaktxakini ĩkapani. Iuasaaki iposope imaktxakiniri kãkiti maerekani. Iuaĩkana ! atatsiirauataika kãkiti maerekani imaktxakini ĩkapani. Erekarinoka kamakari ipĩpe maerekati kamakani ĩkapani. Ipĩpe, Teosomoni ate anikini ĩkapani. Iĩto ipĩpe, iuaritika Erekaru Matamatakoti txĩkitakari iua iuaĩkana auãki inini. ¹⁹ Iuasaaki Erekaru Matamatakoti posotiireẽ isari ipĩkani auiniãtaãmoni. Iuaã kateia ãki ipĩkani aua. Iuaã isãpiretana Teoso misiritinina ninoa, kotxi iuaka kãiata. ²⁰ Kitxakapirĩka ninoa ipĩkani, auãkipanika inakasaakina, ! inirekarina Teoso paniãtakiti ikaminina. Iuasaaki Noee kamanãtari maporo. Teoso iãtapana imaerekanina itakanapinina ĩkapani. Txamari !itakanaparina. Iuasaaki poiãonoka ! ipina. Oitonoka ! ipina, xirataãtxi apokasaaki. Teoso nĩkatana ninoa imapinakani ĩkapani. ²¹ Ikara xirataãtxi hĩpatxisatiko atokokana. Hĩpatxisatiko oerekari kãkiti, Teoso maktxakapekai himapinakani

ĭkapani. Hĭpatxisataãka hĭtoãkiri txiko makatxakiko ĭkapanini, kona maerekati hĭkamakiti makatxakiko ĭkapanini. Hĭpatxisatikosaaki, hĭtxari Teoso: “Nãkixinireẽ ninirekari nikaminiri ikinika pite nireẽkiti iaõka,” hĭtxariko. Xesosi iuaĭkana õkitikasaakiua, imakatxakai himapinakani ĭkapani. ²² Iua kanapiriã Teoso tixinemoni. Uatxa iri kikomoni iĭtopãka. Iuaã Teoso nitiriakori, auĭtetxiakori, kaposotiirerini pakini auĭte itxaua. Ninoa ikinika kamari Xesosi paniãtakiti.

4

Hĭkamariko Ikinipoko Teoso Nireẽkiti

¹ Xesosi atatsiirauata iĭtoã hĭte ĭkapani. Ininiã hinirekariko Xesosi xinikakiti iaõka hĭkamini. ĭkara atoko hinirekiniã, hĭxinikakiti sikataparatarari hãkixinire. Kãkiti atatsiirauatakasaaki iĭtoã, !inirekaikari maerekati ikamini. ² Ininiãkara ĭkorapokoriti auakasaaki, !inirekaikari maerekati iĭto nireẽkiti ikamini. Ikamari Teoso nireẽkiti iaõka ikiniõtika. ³ Mitxi maerekati hĭkamakiti iaõpe. Mitxi Teoso sãkire mauĩãkani nireẽkiti iaõka hĭkama. ĭkini sereti maerekati hĭkama iuasaaki. Iuasaaki hĭkamari ikini sereti hĭto nireẽkiti. Hinirekari ãti kãkiti ĭto. Hĭpoãta. Ikinipoko maerekati hĭkama hĭpoãtakasaaki. Hĭkamari kiiniri maerekati. Hĭteosonetari kãkiti kamakiti, Teoso mauiritakiniti.

⁴ Ninoa Teoso sãkire mauĩãkani txai: “Kinirepa kona hĭpotxitari ate kamakiti iaõka hĭkamini? Peerekari akamakiti,” itxaina. Ininiã ninoa nireẽkiti iaõka himanirekakani xika, ninoa misãkirepiretai hĭte. ⁵ Txamari ãti õti ninoa apakapapiretariko Teoso, kotxi Teoso iposope isãpiretiniri maerekati kamakani misiritiko.

Isāpiretari kākiti auākipanika inakani, apaka kākiti mitxi ipīkani. ⁶ Ininiā Teoso iokanapirena erekari sāpiretaākapeka kākiti. Uatxa ninoa ipīpe. Auākipanika inakasaaki, isāpiretaāka ninoamoni kākiti misiritiko imaerekani xika. Isāpiretaāka ninoamoni kākiti kaminiri Teoso nireēkiti ākixinireē ikiniōtika.

⁷ Imakinika xipokini ōti imatokotapeka. Ininiā kona hāuiritapiri hīto kaminiri inireēkiti. Araōkire hītxako, ininiā hīposotari himisākiretiniri Teoso. ⁸ Iteene hītiretakakauako. Ia apiata Teoso nirekakiti. Iteene hītiretakakauako, kotxi iteene hītiretiniāri āti, poiāo hīxinikari maerekati ikamakiti. ⁹ Kākiti apokasaaki hāapoko, hīpoxokoniritika hāpakapanako. Kona hītsoatape hākixinireē ninoa apokini xika. ¹⁰ Hīkinika hāpakapapekari imaroretxi Teoso parīka hīkamini īkapani. Ikara Teoso sikakiti hītemoni. Ininiā ikara himaroreē hīparīkauata apanakini īkapani. Iuasaaki Teoso nitiriakori erekarini hītxaua. Hīsikariko ātimoni ikini sereti erekari Teoso sikakiti. ¹¹ Hīsākirauatakasaaki, hīsāpiretariko Teoso sākire kākitimoni. Himoianatakasaakiri āti, himoianatariko Teoso posotiireē, ininiā iuasaaki kākiti txari Teoso: “Peerekai pite, kotxi Xesosi Kristo nakitiakori atxaua,” itxari Teoso. Ātipirika ikinimane txapikari Teoso: “Peerekai pite. Ikinipoko posotiiretxi aua pitemoni.” Ameē.

Xesosi Sākire Auiākani Misiritiko

¹² Nitiretakini, ! hītikokape himisiritiko apokasaaki, kotxi ikara ataerekatai. Iteene himisiritaākako, kotxi ikara atoko inakari apokapitikako. ¹³ Iuasaaki hīpoxokoniuatako,

kotxi Xesosi atatsiirauatape, ininiã h̃te apaka atatsiirauatako. Xesosi kanapiriãkasaaki, peerekari iusaaki. H̃te atamatariko ikara, ininiã iusaaki iteene h̃poxokoniua. ¹⁴ Kãkiti xinitakasaakii h̃te, Kristo nakitiakori hininiua xika, h̃poxokoniuatoko, kotxi iusaaki himarotari Teoso aua h̃tekata. Himarotari Erekar Matamatakoti aua h̃kixinireẽ. ¹⁵ Kokaniri, kiitiriri, maerekati kamakari, aãpirena kamakari pakini ! h̃txapeuako. Ikara atoko inakari hininiãua, apakatapitika h̃tatsiiruatini, kotxi h̃tatsiirauata maerekati h̃kamini xika. ¹⁶ Iuaritika h̃tatsiiruatiniã Xesosi sãkire h̃auikini xika, ininiã iusaaki erekapitikari. !H̃pẽtauatape. H̃txariko Teoso: “Peerekai pite, kotxi Xesosi nakiti nitxaua,” h̃txako. ¹⁷ Apokapeka Teoso anaakori misiritiko õti. Merepanika Teoso misiritari iua anaakori imaerekanina xika. Teoso misiritiniãua ate isãkire auiãkani amaerekani xika, ininiã Teoso iokanapirena erekari manirekakani mitekini ! auari. Iteene imisiritana ninoa. ¹⁸ Kitxakapir̃ka Teoso sãkire iõkatsopatakori txari: Pamimari atão inakari kamakani sini Teoso tix-inemoni. Ininiãkara Teoso manirekakani mitekini, maerekati kamakani mitekini ! auari. Imisiritaãkapitikanako, itxa Teoso sãkire. ¹⁹ Apanakini atatsiirauata, kotxi Teoso nirekari atatsiiruatini. Ikara atoko h̃tatsiiruatiniã, iuaritika erekari h̃kamapanikako. H̃auikariko ikinipoko kamakari sãkire, kotxi iua kamari ikinipoko isãkire iaõka.

5

Kõtãkikarerini, ãtokoriakori Pakini

¹ Kōtākikarereri nitxaua nota, ininiā nōtākikai hīte kōtākikarererini. Nota atamatari Kristo misiritiko. Ikanapiriākasaaki, natamatari iua iotximere ikinimane auīte inakasaakia. ² Ininiā nota ōtākikai hīte. Hinīkatanako Teoso sākire auīākani ereē. Soti auīteakori ipitikiri nīkatini atokokana, hinīkatana. Hīsāpiretanako Teoso sākire, kotxi ikara sikakienatari ninoa ākixinire. Teoso sikana ninoa hītemoni hinīkatinina īkapani. Atāo hinirekariko hinīkatinina ninoa. Kona hītxape hākixinireē: “! Ninirekari ninīkatinina ninoa, iuaritika ninīkatana, kotxi ikara niparīka.” Kona hīxinikapiri ikara atoko inakari. !Hīparīkauatape txineiro hāpakapini īkapani. Hīparīkauatako apanakini himoianatini īkapani. ³ Ninoa auīte atoko !hītxapeua. Teoso sikana ninoa hītemoni hinīkatinina īkapani, soti auīteakori ipitikiri nīkatini atokokana, ininiā erekari hīkamako, hīte kamakiti iaōka ninoa kamini īkapani. ⁴ Ininiā ipitikiri apiari apokasaaki, Xesosi apokasaaki, hāpakapariko hīparīka īki. Iuasaaki hāpakapariko saporietā atoko inakari. Ikara Teoso sikakiti peerero, ininiā ikara apakapakani auapininiika. Atamatapikarina Teoso iotximere. Iuasaaki erekari hāpakapakiti !ixipoka.

⁵ Hīte ātokoriakoripekana, hīkamariko aneēkani paniātakiti. Hīkinika, himoianatakakauako. ! Hīuikapeua, kotxi Teoso sākire iōkatsopatakori txari: Teoso iotokakari iuikakaniua kaminiri inireēkitina. Iua sikari ikinipoko erekari miuikakaniuamoni. Itxa Teoso sākire. ⁶ Ininiā hīteka poiāotakauako, kotxi Teosonoka kaposotiireri. Īketo manapi Teoso iuikai hīte, erekari hīkamakiti isāpiretiniri ikinimane. ⁷ Maerekaxiniretinoka hinakasaaki,

imakinika himaerekaxinire hīsāpiretariko iua. Hīsikariko himaerekaxinireni iuamoni, kotxi iua tiretai.

⁸ Kona hīkamapiri hīto nireēkiti. Araōkire hītako, kotxi himokaiakari Satanasi inakori ākiti monōkori atoko itxa. Isaāpota initiniri ikiena. ⁹ Satanasi apokasaaki hītemoni, iteene hāuikariko Teoso sākire. Iusaaki hītaparaxinireritika hāuako. ! Himitekape. ! Hīkamapiri inireēkiti. Himarotari hītariakori ikini itixiti auakani atatsiitiniri imisiritikona hīte atatsiirauatini atokotxikana. ¹⁰ Hīte atatsiirauatako poiāonoka, eereka Teoso parīka hākixinireē iposope ikamini. Iua sikataparaxiniretai. Iteene hāuikari Teoso sākire iusaaki. Satanasi ! iposotari itxīkitakinii maerekati hīkamini iusaaki. Teoso, ikinipoko erekari sikakari, kamari ikara atoko inakari hīte īkapani. Iua akiritai itixine hīsini, ātipirika hāuini īkapani, iua iotximere ātipirika hātamatini īkapani, kotxi Kristo Xesosi nakitiakori hītchaua. ¹¹ Ātipirika ikinimane txari iua: “Peerekai pite.” Ātipirika ikinimane auīte itchaua. Ameē.

Petro Takapiretanapini

¹² Sírası moianatano ia niōkatsopatakiti axapitiri niōkatsopatinii hīte īkapani. Iua aītari. Iua iteene auikari Xesosi sākire. Niōkatsopata hīte nisikataparaxiniretini īkapani. Ninirekari himarotiniri atāo asāpiretinii erekari Teoso sikakiti pirena. ! Hītakanapapiriko erekari Teoso sikakiti hītemoni. ¹³ Teoso nakitiakori, Papirónia sitatxiti auakani, xinikamanapitai hīte. Teoso mereēna ninoā hīte imereini atokotxikana. Marko, namarite atoko inakari,

xinikamanapitai hĩte apaka. ¹⁴ Haõkitakakasaakiua,
himaratakakauako, kotxi hĩtiretakakaua. Teoso
kamaerekaxiniretai hĩte Kristo Xesosi sãkire
auiãkani. Ameẽ.

Teoso sãkire amaneri
New Testament in Apurinã (BR:apu:Apurinã)

copyright © 2004 Wycliffe Bible Translators, Inc.

Language: Apurinã

Translation by: Wycliffe Bible Translators, Inc.

Copyright Information

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apurinã

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 13 Jul 2024 from source files
dated 29 Jan 2022
253eaec7-f0c7-5b49-b6be-65ee5354d0ed